

Bahasa Cerminan Bangsa

Sinar kejora terangi dermaga

Hiasi kota tampak indah

Bangsa Singapura tingkah dijaga

Tutur kata lapik bermadah

Gadis desa berkebaya selesa

Dijahit dara berteman sunti

Dari bahasa menunjukkan bangsa

Sopan bicara mulia pekerti

Nelayan kerja endahkan kukup

Berani mendaga ombak lautan

Bahasa sahaja tidak cukup

Budaya juga menjadi tautan

Putera wangsa mencari harta

Cari peti emasnya berbilang

Budi bahasa budaya kita

Menjadi bukti bangsa cemerlang

Majulah

Api pelita indah berkilau

Jadi pelipur seorang belia

Negara kita sekecil pulau

Tetapi masyhur seluruh dunia

Lajunya kuda sudahlah resmi

Memang terbilang segenap waktu

Walaupun tiada hasil bumi

Bukan penghalang menjadi maju

Merahnya kain dibuat kebaya

Dihias pelikat coraknya lain

Dahulunya miskin kini terkaya

Kerana rakyat bersifat rajin

Seekor tekukur mencari padi

Terjumpa delima di hujung muara

Usah dilentur semangat berbakti

Terus bergema Majulah Singapura

Masyarakat Berjaya

Bunga sekuntum wanginya bau

Cantik ditemani oleh si dara

Semua kaum bersatu padu

Hidup harmoni aman sejahtera

Sungguh indah bila dijeling

Buat si putera jadi tertawan

Jangan pernah kita berpaling

Mari kita teguhkan perpaduan

Malu putera beri senyuman

Mengharap si idaman mula menegur

Marilah kita pesan berpesan

Kerana perpaduan negara masyur

Putera pemalu gembira hati

Kerana dara membalas senyuman

Bangsa bersatu teguhnya berdiri

Seluruh dunia jadi sebutan

Khazanah

Putera wangsa memikat dara
Gagah berlaga bila dihalang
Waris bahasa susun aksara
Perintis pujangga terus gemilang

Terbang kenari mencari kuini
Terlihat katak pelbagai jenis
Shahril Samri pencinta seni
Kacak tidak tetapi manis

Terbang helang jelajah nusa
Nuri berdua memakan zaitun
Acara gemilang gerbang bahasa
Mari semua mula berpantun

Siput mutiara seputih busa
Dibuat gelang hanya seutas
Pelbagai acara sanjung bahasa
Lagu didendang kisah dipentas

Laju berlari seekor kuda
Tiada layu semangat jitu
Sambil lestari bahasa ibunda
Orang Melayu semua bersatu

Warna kain sehijau rumput
Kebaya asli indah di mata
Bangsa lain juga dijemput
Turut kenali budaya kita

Segak jejak orang berbudi
Ingin mengunjung dara jelita
Bahasa pusaka kekal abadi
Terus disanjung pemuda kita

Memang terbilang burung jentayu
Sejak dahulu kisah dipurwa
Takkan hilang bahasa Melayu
Bicara selalu utuh di jiwa

Tiada aral bila berpindah
Rumah besan di tengah desa
Media sosial menjadi wadah
Bahasa warisan si anak bangsa

Gagah pewira jadi iktibar
Pendekar berlima tiada mengalah
Bicara sastera canggung tersebar
Usaha saksama menghapus masalah

Naik perahu putera wangsa
Berkilat gangsa si Taming Sari
Gandinglah bahu pendekar bahasa
Khazanah bangsa mari lestari

Kalau Bukan Melayu, Siapa?

Terbang nan bebas burung jentayu

Terbang timur ke sebuah pulau

Bergema luas bahasa Melayu,

Bicara tutur seluruh rantau.

Permata batu warisan gahara

Dicuri dayang kerana tertawan

Bahasa Melayu bahasa negara

Tetapi sayang tidak diendahkan

Rajinnya belia mencari suasa

Menggunakan kayu untuk menguis

Bahasa mulia cerminkan bangsa

Orangnya Melayu bertutur Inggeris

Mendayung kano ditiup bayu

Ingin bersaing tetapi berat

Katanya kuno bahasa Melayu

Tidak setanding bahasa barat

Padam pelita terkena salju
Semakin sayu suasana luar
Negara kita semakin maju
Bahasa Melayu semakin pudar

Batu-bata warnanya merah
Disimpan rapi dalam graha
Usah kita menyoal pemerintah
Orang sendiri kurang usaha

Bunga yang layu tidaklah indah
Dihalang batu bantut mekarnya
Berbahasa Melayu bila dirumah
Namun itu bukan hakikatnya

Terbangnya angsa mencari makan
Terlihat kancil berlari bebas
Bila bahasa Melayu diabaikan
Anak kecil langsung terjejas

Dalam sumur terlihat belanga

Temboknya berlumut dedaun layu

Semakin makmur kota singa

Semakin luput bahasa Melayu

Terbang rendahnya seekor angsa

Mencuri makan tanaman petani

Ramai bertanya nilai bahasa

Pada zaman globalisasi ini

Tajamnya jarum pabila ditepis

Sangka kain berganda lipatan

Semua kaum berbahasa Inggeris

Mana mungkin berpaling haluan

Sangkakan ikan rupanya kayu

Ditolak ombak ketika pagi

Ramai pertikaikan bahasa Melayu

Kerana tidak relevan lagi

Sungguhnya layu bunga tanjung

Pudar warnanya hilang aroma

Adat Melayu slalu disanjung

Nasib bahasanya tidak sama

Mentari ufuk indahny pandangan

Namun sayu ketika sendiri

Terlalu sibuk mengejar impian

Bahasa Melayu ditolak tepi

Penuh bergaya dara pujaan

Terpijak lecak melihat burung

Pentingkan kerjaya dan kejayaan

Bahasa tidak membawa untung

Mencari harta dalam lautan

Jumpa peti sudah diselongkar

Kata-kata barat dimelayukan

perkataan asli lalu terpujar

Sungguh ayu seorang belia
namun sayang enggan menari
Takkan Melayu hilang di dunia
Tapi hilang bahasa sendiri

Seekor angsa kejar belalang
Endahkan lumut walaupun kabus
Kalau bahasa boleh hilang
Jangan terkejut bangsanya pupus

Tidak terkata indahnyanya bulan
Berteman waktu di tepi tanjung
Usah kita memberi alasan
Bahasa Melayu harus disanjung

Luasnya taman ditiup bayu
Lihat angkasa diterangi kejora
Terus lestarikan bahasa Melayu
Kerna bahasa menunjukkan bangsa

Bersatu Teguh

Indahnya tasik disinar cahaya
Terbangnya helang mencari makan
Temasek berbisik menggoda dunia
Datang berdagang tanpa batasan

Jatuhkan sauh anak kelasi
Terlihat teruna gagah perkasa
Datangnya jauh mencari rezeki
Harapan membina hidup selesa

Tali dililit tanpa menyana
Di hujung hilir walaupun kelam
Walau kulit berlainan warna
Darah mengalir sama di dalam

Nampak pemalu tetapi pejuang
Putera megah keturunan wangsa
Dari dahulu sudah terbilang
Berjiran sebelah tak kira bangsa

Hendak memamah singa membaham

Terlihat kelinchi lari ke dara

Walaupun pernah selisih faham

Usah benci dibiarkan berleluasa

Bunga sekuntum wanginya bau

Cantik ditemani oleh si dara

Semua kaum bersatu padu

Hidup harmoni aman sejahtera

Sungguh indah bila dijeling

Buat si putera jadi tertawan

Jangan pernah kita berpaling

Mari kita teguhkan perpaduan

Malu putera beri senyuman

Mengharap si idaman mula menegur

Marilah kita pesan berpesan

Kerana perpaduan negara masyur

Putera pemalu gembira hati
Kerana dara membalas senyuman
Bangsa bersatu teguhnya berdiri
Seluruh dunia jadi sebutan

Mulanya asmara tetap bersopan
Bagaikan bunga mekar sekuntum
Terus bersama maju ke hadapan
Tanpa mengira apa pun kaum

Hakikat

Bunga sekuntum dihinggap kumbang

Walaupun lentur cantik wajahnya

Isu kaum bila dibincang

Bicara tutur tiada hentinya

Hilangnya peti tertimbun batu

Permata biru tetap dicari

Zaman berganti musim berlalu

Orang Melayu masih berdiri

Bagai zamrud di tengah gulma

Hendak menggait biarpun payah

Walaupun wujud sekian lama

Selalu dikait dengan masalah

Jatuhnya embun di atas peti

Petinya reput rahsia terbongkar

Bersopan santun budi pekerti

Sifat tersebut semakin pudar

Suasana sayu jalan menonong
Enggan berbalah namun cakak
Pabila malu dikata sombong
Andai peramah disangka bongkak

Penuh muslihat seekor buaya
Diwaktu pagi menipu nuri
Susah melihat orang berjaya
Apatah lagi bangsa sendiri

Ketika duha memancing keli
Rehat teruna di atas alas
Yang berusaha sering diperli
Yang sederhana dikata malas

Cantiknya laal menjadi bual
Ingin mengintai tapi dilarang
Jadi terkenal di media sosial
Harapan ramai belia sekarang

Melur ditabur bersama mawar
Jika terpijak hilanglah permai
Andai masyur semuanya benar
Kalau tidak dikutuk ramai

Ketat ikatannya seutas tali
Berganti waktu reputnya perlahan
Tahu dirinya Melayu asli
Tipu mengaku berdarah kacukan

Bayu pagi meniup ranting
Terus lentur dihinggap kenari
Sanjung tinggi bahasa asing
Gagap bertutur bahasa sendiri

Jatuhkan sauh kelasi muda
Terkena batu terhempas kayu
Bila jatuh susah melanda
Rayu bantu mengaku Melayu